

Na osnovu Člana 10 i Člana 22 Statutarne odluke o osnivanju Kongresa Bošnjaka Sjeverne Amerike usvojene 28. maja 2000 godine na Osnivačkoj Skupštini u Chicagu, **Skupština Kongresa Bošnjaka Sjeverne Amerike** na III zasjedanju održanom dana 25. maja 2002 godine u Atlanti, te uz izmjene i dopune sa zasjedanja u St. Louis-u 24. Maja 2003, u Detroit-u 30. Maja 2004, u Chicagu-u 29. maja 2006, u Seattle-u 27. Maja 2007 i predložene i usvojene izmjene i dopune na IX zasjedanju Skupštine u St. Louisu 31. maja. 2008, te posljednje izmjene na zasjedanju vanredne **Skupštine KBSA** u Grand Rapidsu 28. februara 2009

S T A T U T

OPĆE ODREDBE

Član 1.

U cilju sveopćeg razvoja i napretka Bošnjaka u Sjevernoj Americi, te njihovog boljeg povezivanja, u cilju jačanja, unapređenja i povezivanja bošnjačkih organizacija, institucija te pojedinaca, njihove koordinacije i usklađivanja djelovanja, te u cilju boljeg povezivanja bošnjačke dijaspore Sjeverne Amerike sa drugim bošnjačkim dijasporama i sa maticom Bosnom i Hercegovinom, dana 28. maja, 2000. godine u Chicagu, USA, osnovan je KONGRES BOŠNJAKA SJEVERNE AMERIKE (u daljem tekstu : "Kongres" ili "KBSA").

Član 2.

KBSA je neprofitna i nevladina, samostalna i neovisna organizacija Bošnjaka nastanjenih u Sjevernoj Americi (USA i Kanada). KBSA artikulira i predstavlja sve interese Bošnjačke zajednice Sjeverne Amerike i promovira sve pozitivne aspekte bošnjačkog kulturnog nasljeđa, bošnjačke etike i bošnjačkih vrijednosti života. KBSA je krovna organizacija bošnjačke dijaspore Sjeverne Amerike.

Član 3.

Korespondencija izmjeđu članova UO da se i dalje vrši primarno putem emaila.

A. Sjedište Kongresa je u Chicagu, sa adresom:
P.O. Box 408157, Chicago, IL 60640.

B. Sjedište kanadskog ogranka KBSA je u Torontu sa adresom:
P.O. BOX 56073, Stoney Creek, ON, L8G 5C9

C. Na osnovu Odluka UO i Skupštine KBSA, te zbog različitosti u pravnim propisima SAD i Kanade izvršena je registracija KBSA na federalnom nivou Kanade pod nazivom "KBSA ogranak za Kanadu". KBSA ogranak za Kanadu je sastavni dio KBSA sto je regulirano Statutom i drugim normativnim aktima KBSA ogranak za Kanadu.

DJELATNOSTI KONGRESA

Član 4.

Utvrđuju se sljedeće djelatnosti Kongresa:

A. Rad na pamćenju genocida izvršenih nad Bošnjacima, na sjećanju naših šehida, gazija i nevinih žrtava, koji će, kroz obrazovanje širih masa i javnu prezentaciju, proizvesti institucionalni metod borbe protiv zaborava;

B. Aktivan rad na međusobnom informiranju, savjetovanju i pomoći sa sličnim bošnjačkim i bosanskohercegovačkim organizacijama u drugim državama u cilju što boljeg međusobnog povezivanja i povezivanja sa maticom Bosnom i Hercegovini, te ostalim zajednicama Bosnjaka u drugim državama svijeta;

C. Informiranje i upoznavanje odgovarajućih institucija zakonodavne, izvršne i sudske vlasti u SAD i Kanadi o dominantnim procesima, odnosima, aktualnoj situaciji, specifičnim potrebama i problemima unutar Bošnjačke zajednice Sjeverne Amerike, države Bosne i Hercegovine, uz zahtjeve i predlaganja donošenja, od strane tih institucija, odgovarajućih izjava, deklaracija, rezolucija i drugih dokumenata;

D. Informiranje i upoznavanje generalne javnosti o specifičnim bošnjačkim postignućima, potrebama i problemima, informiranje i upoznavanje generalne javnosti o historiji Bošnjaka kao i o kulturnim, ekonomskim, pravnim i socijalnim značajkama sistema USA i Kanade te aktivno uključivanje u sva polja ovih sistema;

E. Aktivnosti i rad na promoviranju i unapređenju svih vrijednosnih odrednica bošnjačkog nacionalnog bića. Inicirati osnivanje Vijeća Intelektualaca koje bi imalo savjetodavnu ulogu i djelovalo po potrebi na projektima KBSA.

ČLANSTVO KONGRESA

Član 5.

Članice Kongresa su sve bošnjačke organizacije i pojedinci koje djeluju na području Sjeverne Amerike, BiH i šire a koje prihvataju Statut, Program rada i ostale akte Kongresa. Članice mogu delegirati svoje predstavnike (delegate) na Konvenciji KBSA i to po kriterijumu brojnosti:

Samostalne organizacije članice koje rade mimo koordinacija dva (2) delegata
Lokalne Koordinacije KBSA registrovane na državnom nivou

- do 50 članova - do 5 delegata,
- od 51 do 100 članova - do 7 delegata,
- od 101 do 200 članova - do 9 delegata,
- preko 200 članova - do 10 delegata.

Organizacije su dužne plaćati godišnju članarinu KBSA u iznosu od:

- \$200 po delegatu.

Pojedinačno (individulano) članstvo u Kongresu utvrđuje se članarinom od:

- \$200 godišnje – sa pravom glasa.
- Počasni članovi ne plaćaju članarinu i nemaju pravo glasa.

Član 6.

Počasni članovi Kongresa mogu biti Bošnjaci, druge osobe koje smatraju Bosnu i Hercegovinu

svojom domovinom i svi prijatelji Bosne i Hercegovine i Bošnjaka koji su izuzetno doprinijeli njihovom razvoju i afirmaciji.

Član 7.

Odluke o načinu prikupljanja i ostala pitanja u vezi sa članarinom uređuje svojom odlukom Upravni Odbor (UO) Kongresa.

ORGANI KONGRESA

KONVENCIJA KONGRESA

Član 8.

Najviši organ Kongresa je Konvencija koju čine delegati KBSA. Kvorum Konvencije utvrđuje se i verificira na samom početku zasjedanja Konvencije na taj način što će se verificirati odluke članica o delegiranju predstavnika u skladu sa Članom 5. i Članom 12. ovog Statuta. Mandat delegata traje do sljedećeg saziva Konvencije. Broj mandata pojedinog delegata je neograničen.

Član 9.

Nadležnosti Konvencije su sljedeće:

- Usvajanje Poslovnika o svom radu,
- Usvajanje Statuta Kongresa, te njegovih izmjena i dopuna,
- Izbor i imenovanje Upravnog odbora Kongresa,
- Usvajanje godišnjeg plana rada Kongresa,
- Usvajanje finansijskog plana rada Kongresa,
- Donošenje rezolucija i deklaracija KBSA,
- Donošenje odluke o prestanku rada Kongresa.

Zasjedanjem Konvencije rukovodi Radno Predsjedništvo Konvencije koje čine predstavnik domaćina, i ujedno predsjedavajući, zatim po jedan predstavnik Koordinacija: Canada, Illinois, Missouri, New York, Michigan uz suglasnot Upravnog odbora. Mandat Radnog Predsjedništva Konvencije traje dvije godine tj. do saziva sljedeće Konvencije.

Nadležnosti Radnog Predsjedništva Konvencije:

- Učestvuje u pripremi, izradi i donošenju skupštinskih Akata i Propisa (Statuta, Poslovnika o radu, te drugih skupštinskih akata i propisa),
- Stara se da se svi Skupštinski akti i propisi izvršavaju na vrijeme,
- Prati zakonitost donošenja i primjene Skupštinskih akata i propisa,
- Obavlja ostale poslove vezane za rad same Konvencije,
- Za sve ostale Aktivnosti između dvije Konvencije Radno Predsjedništvo je odgovorno UO KBSA.

Član 10.

Konvencija sve odluke donosi **tajnim glasanjem**, putem glasačkih listića, dvotrećinskom većinom od ukupnog broja prisutnih delegata na zasjedanju sa pravom glasa.

Konvencija zadržava pravo da glasanje za odluke koje nisu od vitalnog značaja i koje se ne tiču pravnih akata i/ili izborne procedure može da se obavi javnim glasanjem tj. dizanjem ruke ili aklamacijom. Članovima koji nisu u stanju da lično prisustvuju glasanju se daje mogućnost *proxy* glasanja.

UPRAVNI ODBOR KBSA

Član 11.

Upravni Odbor KBSA je izvršni organ Kongresa, broji petnaest (15) članova i to:

A. 6 Članova čine predsjednici Komiteta KBSA, koji su izabrani na osnovu ponudjenog programa rada.

B. 9 članova izabranih na Konvenciji, po osnovu prijedloga Koordinacija, pojedinačnih organizacija ili pojedinaca.

Izbor kandidata se vrši u skladu sa Članom 12 ovog Statuta

U UO od 15 članova, maksimalno 2 mogu biti iz iste Koordinacije, te maksimalno 3 iz Kanade, o čemu vodi računa Radno Predsjedništvo Konvencije.

IZBOR I IMENOVANJE KANDIDATA ZA UO KBSA

Član 12.

Izbor kandidata za UO KBSA će se vršiti na osnovu pravila o izborima predviđenih ovim Statutom.

Konvencija na osnovu prijedloga Radnog predsjedništva aklamacijom bira 5 članova izborne Komisije.

- a. Sve Koordinacije, bošnjačke organizacije ili pojedinci imaju pravo ravnopravno da predlože kandidata sa programom za predsjednika određenog komiteta KBSA;
 - Predloženi kandidat za predsjednika komiteta mora da ima visoku stručnu spremu i da vlada bosanskim, kao i engleskim ili francuskim, te da posjeduje određeno iskustvo u radu iz oblasti komiteta za koji je predložen;
 - Ponuđeni program mora da sadrži dugoročni plan i program razvoja i rada komiteta za koji se kandidira kao i razrađen plan za ostvarenje tog programa;
 - Spisak predloženih kandidata i primjerak programa se mora dostaviti članovima Radnog predsjedništva najkasnije 45 dana prije održavanja Konvencije;
 - Radno Predsjedništvo treba najkasnije 21 dan prije Konvencije svim Koordinacijama, organizacijama i pojedincima [delegatima konvencije] omogućiti uvid u sve pristigle prijedloge i programe.
- b. Sve Koordinacije, ostale bošnjačke organizacije i pojedinci imaju pravo da ravnopravno predlažu svoje kandidate za devet (9) mjesta u UO KBSA.
 - Izbor kandidata pod tačkom A i B ovog člana vrši Konvencija putem tajnog glasanja glasačkim listićima. Kandidati sa najvećim brojem glasova bivaju izabrani.
 - Konvencija prvo bira predsjednike Komiteta pa tek onda preostalih devet članova UO KBSA;
 - Predlagači kandidata za predsjednike komiteta zadržavaju pravo da ukoliko njihov kandidat ne bude izabran za predsjednika Komiteta istog člana predlože na Konvenciji kao kandidata za preostalih 9 članova UO KBSA;
 - Svi kandidati predloženi u članstvo UO moraju biti prisutni na Konvenciji osobno ili proxy putem i moraju prihvatiti kandidaturu;
 - Mandat članova UO traje do 2 GODINE I MOŽE SE PRODUZITI ZA JOS *TRI MANDATA* (konsekutivno ili sa prekidom između mandata)
 - Izabrani članovi UO između sebe biraju tajnim glasanjem predsjednika, sa najmanje 2/3 glasova. Ukoliko pojedinac ne dobije potrebnu većinu u prvom krugu u drugi krug glasanja idu dva kandidata sa najvećim brojem glasova. Time kandidat sa drugim po redu brojem glasova poslije drugog kruga glasanja postaje podpredsjednik UO;

- Predsjednik Komiteta za pravna pitanja je Sekretar UO,
- Predsjednik Komiteta za informisanje je ujedno i Glasnogovornik UO,
- Predsjednik Komiteta za finansije i soliticiranje donatora je blagajnik UO,
- Mandat predsjednika UO traje 2 godine i može se produžiti za još dva mandata;

c. Članovi UO KBSA su dužni potpisati Sporazum o Održavanju Povjerljivosti Informacija „*Confidentiality Agreement*“, kojim se obavezuju da će čuvati informacije unutar UO KBSA i da ih neće prosljedjivati bez odobrenja dvotrećinske većine. Objavljivanje emaila, telefonskih razgovora između članova UO KBSA bez odobrenja većine članova UO je direktan prekršaj Sporazuma o Povjerljivosti *Confidentiality Agreement* i uzrok opozivu člana UO.

Član 13.

(A) Nadležnosti Upravnog odbora su sljedeće:

- Realizacija djelatnosti KBSA utvrđenih Statutom i planovima rada KBSA,
- Formiranje Koordinacija po regionalnom principu uključujući teritoriju BiH, te principe njihovog rada,
- Pripremanje godišnjih planova rada Kongresa kao i finansijskih planova,
- Priprema rezolucija i deklaracija KBSA,
- Utvrđivanje prijedloga Statuta Kongresa te njegovih izmjena i dopuna,
- Izrada plana najvažnijih bošnjačkih proslava, aktivnosti i manifestacija od značaja za cijelu Sjevernu Ameriku,
- Planiranje i realizacija aktivnosti od značaja za povezivanje dijaspore Bošnjaka Sjeverne Amerike sa drugim dijasporama, te sa maticom,
- Dodjela najvećih priznanja KBSA istaknutim organizacijama i pojedincima (Plaketa i Zahvalnica),
- Obavljanje i drugih poslova od značaja za provođenje djelatnosti Kongresa utvrđenih ovim Statutom;

(b) U SKLADU SA CLANOVIMA 2 I 4 OVOG STATUTA, UO KBSA može formirati Komitete za Politička i strateška pitanja u odnosima sa institucijama BiH i zemljama u kojima žive Bošnjaci, te druge Komitete prema potrebama KBSA iz sljedećih oblasti djelovanja:

- Komitet za pravna pitanja,
- Inicijativni Komitet za osnivanje Svjetskog kongresa Bošnjaka, bošnjačkog muzeja genocida, bošnjačke akademije znanosti i umjetnosti i sabora Bošnjaka,
- Komitet za informiranje i održavanje web stranice KBSA,
- Komitet za kulturu i obilježavanje nacionalnih praznika,
- Komitet za članstvo, finansije i soliticaciju donatora i odnose sa drugim zajednicama,
- Komitet za povratak u domovinu.

Članove Komiteta predlažu Koordinacije, TE OSTALE BOSNJACKE ORGANIZACIJE (KUD, BOŠNJAČKA UDRUŽENJA, itd.), a njihov izbor potvrđuje UO KBSA. Na čelu svakog Komiteta je član UO KBSA, izabran(a) prema sposobnostima, stručnoj spremi i afinitetu. Svaki odbor pravi nacrt pravilnika o radu odbora u skladu sa Statutom i *Bylaws* KBSA. Taj nacrt potvrđuje UO KBSA i proglašava ga radnim dokumentom dotičnog Komiteta.

(c) NADLEŽNOSTI KOMITETA

- Učestvovanje u aktivnostima prema odredbama UO KBSA,
- Pružanju stručnih savjeta UO KBSA, kad UO zatraži i smatra neophodnim,
- Aktivnosti vezane za davanje stručnih analiza i savjeta u vezi održavanja i priprema Skupštinskih zasjedanja.

(d) Članovi Komiteta imaju savjetodavnu ulogu bez izvršne odgovornosti.

Za uspješniji i funkcionalniji rad, UO ima ovlast da angažira stručna lica iz određenih oblasti; isto tako može formirati komisije posebne namjene sa vremensko ograničenim trajanjem:

- Komisija za žalbe (disciplinska komisija),
- Finansijska komisija,
- I druge komisije neophodne za rad UO.

Član 14

(A) Disciplinske radnje i mjere UO KBSA

UO na prijedlog Predsjednika ili dvije trećine članova UO KBSA, može suspendovati ili predložiti Konvenciji razrješenje člana UO u sljedećim slučajevima:

- Rad člana UO u suprotnosti sa Statutom KBSA,
- Neizvršavanje ili zloupotreba preuzetih obaveza,
- Neaktivnosti, tj. pasivnosti u radu UO,
- Ako član svojim radom remeti međuljudske odnose u UO i KS i Konvencije KBSA,
- Iz razloga druge prirode koje utvrdi UO KBSA.

Odluka o suspenziji ili prijedlog Konvenciji za razrješenje člana UO KBSA, donosi UO na svojoj redovnoj sjednici. Sekretar UO je dužan pismenim ili elektronskim putem obavijestiti člana UO o donesenoj odluci. Član UO kojem je izrečena mjera suspenzije ili prijedlog Konvenciji za razrješenje, ima pravo da u predviđenom roku od 15 dana od dana donošenja odluke uputi pismenu žalbu UO KBSA. (Disciplinskoj komisiji KBSA koju prethodno formira u UO na prijedlog Predsjednika UO). Ukoliko je član UO kojem je izrečena suspenzija, ispoštovao Statutom predviđeni rok od 15 dana i priložio žalbu na odluku UO (Disciplinskoj komisiji), Komisija je dužna razmotriti razloge navedene u žalbi i u roku od 30 dana od dana prijema žalbe donijeti svoj stav i proslijediti ga UO KBSA. UO na svojoj redovnoj sjednici donosi konačnu odluku.

Disciplinske mjere:

- Disciplinske mjere suspenzije (privremenog dejstva) u nadležnosti UO KBSA,
- Disciplinska mjera razrješenja (trajnog dejstva) u nadležnosti Konvencije KBSA.

(b) Opoziv

Inicijativu za pokretanje opoziva bilo kojeg obnašatelja funkcije, člana ili kompletnog organa KBSA može se pokrenuti po sljedećem postupku:

- Inicijativu za smjenu predsjednika UO KBSA ili predsjednika Komiteta može pokrenuti 1/3 članova ili 1/3 delegata Konvencije pismenim zahtjevom UO. Odluku o opozivu donosi UO KBSA 2/3 brojem glasova.
- Inicijativu za smjenu kompletnog UO može pokrenuti 1//3 delegata pismenim putem upućenu radnom predsjedništvu. UO saziva vanrednu Konvenciju. Odluku o smjeni donosi Konvencija sa 2/3 brojem glasova prisutnih delagata Konvencije.

Član 15.

Upravni odbor donosi odluke dvotrećinskom većinom članova.

Sastanci članova UO sazivaju se jedanput godišnje ili po potrebi.

Redovni i vanredni sastanci UO, pored Predsjednika, mogu biti sazvani od strane dvije-trećine članova Upravnog Odbora.

Rokovi za sazivanje:

- redovnih sastanaka: 30 – 90 dana prije održavanja datuma sastanka,
- vanrednih sastanaka: 20 dana prije održavanja datuma sastanka.

U pozivu na Sastanak treba biti navedeno sljedeće: datum, mjesto, vrijeme i po potrebi dnevni red sastanka.

O radu Upravnog odbora na sastancima se mora voditi zapisnik na engleskom i bosanskom. Upravni Odbor može donositi odluke i telefonskim i elektronskim sredstvima komuniciranja uz obavezno obezbjeđivanje dokaza o glasanju članova.

Član 16.

Funkcije u UO KBSA: Predsjednik, Podpredsjednik, Glasnogovornik, Sekretar i Blagajnik

Predsjednika UO biraju članovi iz svojih redova tajnim glasanjem između dva ili više kandidata;

Nadležnosti rukovodstva:

a. Predsjednik UO Kongresa

- Predsjednik UO predstavlja Kongres u susretima sa predstavnicima zvaničnih organizacija i institucija, kao i drugih pravnih lica,
- Saziva redovne i vanredne sjednice UO pod uslovom da se izjasnila većina članova UO;
- Nalaže, prati i učestvuje u izvršavanju postavljenih djelatnosti članovima UO,
- Predsjednik UO ima pravo pokretanja disciplinskih mjera (suspenzija - UO, razrješenje – zahtjev Konvenciji) i drugih prava i obaveza predviđenih Statutom KBSA,
- Za svoj rad je odgovoran UO i Konvenciji KBSA,
- Predsjednik može imati na raspolaganju novčana sredstva u iznosu do \$1,000 dolara za izmirivanje redovnih potreba UO Kongresa (neophodne finansijske troškove).

b. Podpredsjednik UO

- Preuzima sva prava i obaveze Predsjednika u njegovoj odsutnosti,
- Podpredsjednik uz saglasnost i dogovor sa Predsjednikom može pokrenuti i poduzeti inicijativu za izvršavanje određenih poslova predviđenih u planu i programima rada UO i Konvencije KBSA,
- Obavlja druge poslove predviđene Statutom KBSA; Za svoj rad je odgovoran UO i Konvenciji KBSA.

c. Glasnogovornik UO

- Obavlja poslove pisanja saopćenja, pisama, apela, rezolucija, te deklaracija uz saglasnost UO,
- Davanje saopćenja putem štampe, medija i drugih javnih glasila u dijaspori i matici,
- Obavlja i druge poslove predviđene Statutom KBSA,
- Za svoj rad je odgovoran UO i Konvenciji KBSA.

d. Sekretar UO

- Za obavljanje svakodnevnih/redovnih poslova u radu UO zadužen je Sekretar,
- Pisanje zapisnika na sjednicama i dostavljanje istih članovima UO,
- Vođenje arhive i drugih dokumenata o radu UO,
- Slanje materijala i informacija članovima UO o održavanju kulturnih manifestacija,
- Obavlja druge poslove predviđene Statutom KBSA,
- Za svoj rad je odgovoran UO i Konvenciji KBSA.

e. Blagajnik UO

- Za vođenje finansija o radu UO zadužen je blagajnik,
- Za vođenje evidencije ulaza i izlaza novčanih sredstava KBSA,

- Isplata redovnih novčanih sredstava odobrenih od strane UO,
- Izvještaj o stanju finansija KBSA za periode (tromjesečne, šestomjesečne, godišnje),
- Pravljenje finansijskog izvještaja za održavanja redovnih Konvencija KBSA,
- Obavlja i druge finansijske poslove predviđene Statutom KBSA,
- Za svoj rad je odgovoran UO i Skupštini KBSA.

g. Članovi UO

Svaki član u UO, usred opravdane odsutnosti rukovodstva UO, može preuzeti određena prava i aktivnosti ako to izričito zahtijeva situacija, uz saglasnost većine članova u UO. U te aktivnosti spadaju: pisanje prigovora, pisanja pisama posebne namjene, apela i sve druge aktivnosti koje imaju za cilj unaprjeđenje, promovisanje i zaštitu interesa KBSA, kao i drugih prava i obaveza predviđenih Statutom KBSA;

Za svoj rad članovi UO su odgovorni UO i Konvenciji KBSA.

KOORDINACIJE KBSA

Član 17 (a).

U ovisnosti od situacije na terenu, Upravni odbor Kongresa će po regionalnom principu formirati Koordinacije Kongresa na području Sjeverne Amerike, BiH i šire u Svijetu.

Odlukom o osnivanju, Upravni odbor će za svaki konkretnu regiju odlučiti o broju članova svake Koordinacije, te utvrditi druga pitanja od značaja za rad Koordinacija. Osnivanje Koordinacija KBSA je isključivo u nadležnosti UO KBSA kao i do sada, s tim da se Koordinacije trebaju registrirati na nivou države u SAD. Ovim se izbjegava prelijevanje sukoba unutar lokalnih zajednica na sam UO KBSA. Koordinacije koje su osnovane bez znanja Upravnog odbora, su ilegalne sve dok UO ne potvrdi legalnost osnivanja dotičnih koordinacija zasnovano na odredbama statuta KBSA. Članovi UO lokalnih Koordinacija moraju potpisati tzv. *Confidentiality Agreement* čime bi se obavezali na očuvanju vrijednosti KBSA.

Koordinacije su u potpunosti odgovorne UO KBSA te podnose redovan godišnji izvještaj o svome radu, aktivnostima i planovima. UO KBSA će godišnje obnavljati listu postojećih Koordinacija sa svojim članovima.

Član 17(b).

Utvrđuju se nadležnosti Koordinacija:

- Osnivanje novih, te podsticanje rada postojećih bošnjačkih organizacija na svom terenu, te koordinacija njihovog rada,
- Realizacija sopstvenih aktivnosti u skladu sa djelatnostima Kongresa utvrđenih ovim Statutom,
- Suradnja sa drugim koordinacijama,
- Prikupljanje i uplata članarina na račun Kongresa,
- Obavljanje i drugih aktivnosti u skladu sa odlukama Upravnog odbora Kongresa.

Organizaciono, Koordinacije su sastavljene od najmanje 7 članova sa Predsjednikom, Podpredsjednikom, Sekretarom, Blagajnikom i ostalim članovima Koordinacije.

Svoj rad mogu organizovati donošenjem posebnog Pravilnika o radu Koordinacije koji mora biti u skladu sa Statutom KBSA.

Finansiranje Koordinacija vrši se od donacija i članarina.

Koordinacije mogu aplicirati za grant u lokalnim sredinama ukoliko zadovoljavaju kriterije za iste. Koordinacije će zadržati za lokalne potrebe 30% sredstava od članarine KBSA, a ostalo uplatiti na račun u centralu KBSA, uz krajnji rok izvršenja 30 dana prije održavanja redovne Skupštine KBSA.

Član 17 (c).

Koordinacije mogu formirati sljedeće odbore:

- Finansijski odbor,
- Odbor za pitanje ekonomskog napretka,
- Odbor za organizaciju kulturnih, sportskih i drugih manifestacija,
- Odbor za odnose sa drugim Koordinacijama,
- Odbor za prava prognanika i socijalna pitanja,
- Odbor za pitanja demobilisanih boraca, te boračka pitanja,
- Odbor za promoviranje KBSA u američkoj javnosti,
- Odbor za pitanja ravnopravnog tretmana manjina.

Član 17 (d).

Ukoliko ne postoje uvjeti za formiranje Koordinacije, Upravni odbor može imenovati Povjerenika Kongresa za pojedinu regiju Sjeverne Amerike. Povjerenik je dužan da se u svom radu pridržava ovog Statuta i odluka Upravnog Odbora i da nastoji stvoriti uvjete za formiranje Koordinacije na svom području. Povjerenik je u potpunosti odgovoran članovima UO KBSA. Povjerenici nemaju pravo glasa na konvenciji KBSA osim ako nisu uplatili članarinu po članu pet (5) ovog Statuta.

FINANSIRANJE KONGRESA

Član 18

Kongres će se finansirati iz sljedećih izvora:

- Od članarine,
- Od donacija,
- Od sredstava iz Fonda pokrovitelja,
- Iz drugih izvora u skladu sa propisima o finansiranju nonprofit organizacija u Sjevernoj Americi.

PRELAZNE I ZAVRŠNE ODREDBE

Član 19.

Ovaj Statut i prijedlog njegovih izmjena i dopuna stupa na snagu od dana donošenja.

Izmjene i dopune ovog Statuta verificira Konvencija KBSA.

Izmjenjene odredbe Statuta u pogledu izbora članova UO KBSA mogu biti primjenjene na prvoj narednoj Izornoj Konvenciji nakon usvojenih izmjena.

Tumačenje i primjena ovog Statuta stavlja se u nadležnost Upravnog Odbora Kongresa. Ukoliko dođe do kolizije između ovog Statuta i pravila po kojima je KBSA registriran (*ByLaws*), primjenjivaće se članovi Statuta.

Odluku o prestanku rada Kongresa i o svim reperkusijama koje mogu nastati nakon takve odluke može donijeti samo Konvencija Kongresa.

Grand Rapids, Michigan 28 februar, 2009